

Voces de Queempostela

Boletín Mensual
de Información

Nº23 OUTUBRO 1998

Editado polo
C.G.C.

De volta ao trabalho !

Despois duns merecidos meses de repouso, sócios e voluntarios do CGC comenzaron de novo a se reunir para programar as actividades que realizará a asociación nos vindeiros meses. Un dos puntos principais será un maior achegamento e colaboración coa asociación lésbica compostela BoGa. Nesta liña, un dos obxectivos prioritarios será o da busca dun novo local que se ha compartir con aquela. Esta decisión, xa ratificada pola asemblea do CGC pasará pola do BoGa nos vindeiros días. Unha vez tomada a decisión, ambos as asociacións principiarán conversas para establecer estratéxias de financiamento conxunto e busca de local.

Sai á rua o "Fluxos"

O pasado mes de xullo saíu á rua o primeiro número de "Fluxos Anuario galego de estudos gais e lesbicos". Xa se repartiron exemplares por numerosas asociacións homosexuais de Galiza, Portugal, Estado Español e Europa. O anuario "Fluxos" é editado pola Asociación Sociocultural Blanco-Amor -criada no seo do CGC- e conta cunha subvención da Dirección Xeral de Política Lingüística da Xunta de Galiza. "Fluxos" xa se pode comprar por 600 pts. en librarías de Compostela e nas vindeiras semanas comenzará a sua distribución por outras cidades do país, así como as doazóns a diversas bibliotecas de universidades galegas. Xa comenzaron os traballos para a edición do vindeiro número, no que haberá colaboracións de Gales e Cataluña. Se queres adquirir o teu número de "Fluxos" pasa polo local do CGC no horario de costume ou escribe ao noso apartado.


Parladoiro para novembro

O CGC reinicia o seu tradicional ciclo de parladoiros o vindeiro mes de novembro. O primeiro desta tempada tratará o tema da relixión en relación coa homosexualidade. Especialmente, falará-se do tratamento que lle dan a homosexualidade as igrexas cristiás e da situación dos gais e lésbicas crentes e/ou praticantes. O parladoiro, como é habitual, celebrará-se no pub compostelán "Modus Vivendi". Ainda están por concretar a data e hora finais. Se queres achegar textos ao debate, pasa polo local do CGC ou envia-os por correo.

Festa para finais de novembro

O CGC e mais o BoGa ante a demanda de simpatizantes e público en xeral, están a pensar na celebración dunha gran festa para a derradeira fin de semana do vindeiro mes de novembro. Coa data e hora exacta por concretar pensan-se iniciar conversas coa

discoteca "Factoría", lugar onde se celebraron con éxito anteriores festas. Por suposto, fai-se un chamamento a todas aquelas persoas que queiran participar, xa sexa actuando sobre o cenário ou organizando xogos ou outras actividades alternativas, para que se poñan en contacto de contado con calquera das dúas asociacións.



Valoración dos actos do 28-X

A asemblea do CGC avaliou na sua primeira reunión de setembro a celebración en Compostela do Dia do Orgullo e da Libertación Homosexual. En xeral, na reunión falouse de éxito nos actos organizados especialmente na festa e no campionato de mari-brilé. Tamén se valorou positivamente a celebración do mari-pícnic e a exposición de pancartas do CGC e Mi-Homes ao ar libre. Así e todo mália o seu colorido neste ano, a concentración reivindicativa segue sen convocar un número significativo de persoas. Unha das causas principais é o medo á visibilidade que segue amosando apesar dos evidentes avances aos que asistimos en Compostela nos últimos anos a comunidade lesbiana da cidade. Ficou ás claras o contraste abismal entre a asistencia á concentración -menos de 100 persoas!- e á

festa máis de 400!. Os gais e lésbicas seguen preferindo espazos pechados ou exclusivos para se relacionar explicitamente ou expresar as suas reivindicacións. Xa que logo un dos traballos principais do CGC para os vindeiros meses será o de retomar a campaña de visibilidade para vencer o medo e a hipocrisia que se segue observando claramente en certos sectores da nosa comunidade.

Onde vai o proxecto de EdeG ?

Nas pasadas semanas as asociacións homosexuais galegas souberon pola prensa que Esquerda de Galicia apresentara no Parlamento un proxecto de lei autonómica sobre as parellas de feito. Até o de agora e que saiba o CGC esta formación política non se puxo en contacto con nengunha asociación homosexual galega para lle entregar unha cópia do proxecto, discutí-lo ou informar sobre os trámites polos que ha pasar na cámara galega. Nos vindeiros días representantes do CGC tentarán pór-se en contacto cos deputados de EdeG -dous- para conseguir unha cópia do proxecto e poderen discutir sobre el con esta e outras formacións políticas con representación parlamentar.



Reorganización asociativa en Ourense

Durante os últimos meses produciu-se na cidade de Ourense unha reorganización do asociacionismo lesbigai. Deste proceso, e da antiga "Libertaçom Homossexual", xorde unha nova asociación mixta de gais e lesbianas que xa comezou a se reunir. O seu nome é CGLOu (Colectivo Gai e Lésbico Ourensán) e desde a asociación faise un chamamento a todas aquellas persoas interesadas a que se acheguen ás suas reunións nun local cedido polo Comité Anti-Sida ourensán. Este local está na rua Dr. Fleming nº 43 (soto) e as reunións son todos os venres entre as 10 e as 13 horas. Ademais o CGLOu tamén dispón de enderezo electrónico c glo@lettera.net

Entra en vigor a lei de parellas catalana

O pasado 20 de outubro entraba en vigor en Cataluña a nova lei de familia na que se recoñecen as parellas de feito homosexuais como unidades familiares. A lei, que supon un avance indubidábel para a comunidade lesbigai catalana non permite a adopción ás parellas homosexuais e, por outra banda, cumple lembrar que a lei fica limitada ao ámbito competencial da Generalitat. Mália certas críticas feitas polas asociacións ho-

mosexuais -sobre todo no que se refire a adopción e certas consideracións fiscais-, estas acollerón positiivamente a lei. Lembremos, por outra banda, que a Lei de Familia galega aprobada no 1997 non recibe abertamente -ainda que tampoco o nega- as parellas de feito homosexuais como unidades familiares. O goberno galego ainda non sacou regulamento nengún que explicase polo miúdo o status das parellas gais e lésbicas na legislación galega e sobre todo a efectos prácticos, ante o goberno autonómico.

Novos carteis, novo logo...

Durante as pasadas asembleas do CGC tense falado da necesidade de facer un novo cartel de promoción das actividades da asociación. A tiraxe do vello cartel xa está case esgotada e o CGC precisa facer unha nova campaña xeral de difusión das actividades.. Asimismo o CGC está a pensar na posibilidade de utilizar un logo novo. Se queres achegar o teu deseño de cartel co teu lema, ou un deseño para un novo logo, envíalo por correo ou pasa polo local no horario de permanencias.

Máis participación no "Voces"

Na última asemblea do CGC falouse da posibilidade de abrir máis o "Voces de Queempostela" á participación directa das outras asociacións homosexuais galegas tanto na redacción como no financiamento. Até o de agora, o Bo.Ga acolleu a proposición positivamente ainda que non o discutiu na asemblea. o resto das asociacións ainda non se pronunciaron ao respecto.

Asociacións homosexuais de Galiza

Colectivo Gai de Compostela

Local: Rua Entremuros, 16B. Baixo Compostela.
Permanencias: luns, mércores, xoves e venres de 20:30 a 21 horas. Reunión semanal, martes ás 20:30 horas.
Correo: Apdo. 191 / 15780 Compostela
Correo electrónico: gai.compos@hotmail.com
Páxina Web: www.geocities.com/westhollywood/9463

BOGA - Colectivo de Lesbianas de Galicia

Correo: Apartado 2169 / 15780 Compostela
Correo electrónico: lesbicompas@hotmail.com
Teléfono: 919-34-67-53

Mil-Homes, Grupo Gai da Coruña

Correo: Apartado 24 / 15080 A Coruña

GALEGA (Gais e Lesbianas de Galicia)

Correo: Apartado 665 / 27001 Lugo
Teléfono: (982) 24-45-60 extensión 1

CGLOu (Colectivo Gai e Lésbico Ourensán)

Correo: Apartado 162 / 32003 Ourense
Local: Dr. Fleming, nº 43 - Soto. Reunión semanal: venres de 10 a 13 h.
Correo electrónico: c glo@lettera.net